



天目先生集卷之十六

吳興徐中行子與 著

墓志銘

明通議大夫都察院右副都御史贈兵部  
左侍郎熊公墓志銘

公開府南越卒于軍

上賜祭葬以某年月葬于某山同舉嘉靖庚戌  
進士徐某按家狀志之其先山西陽曲人自宋  
季二生元轉運判萬安一傳徙武寧又一傳徙

武昌曰世昌者生安縣令友信友信生散官錄  
鑄生南海丞清娶萬氏三子極爲經歷棧爲千  
戶公名桴字元乘以正德丁卯正月九日生先  
有丹鳳紅日之夢幼穎敏敦龐不好弄而力學  
十六受博士詩凡二十二年乃舉七年而仕故  
其蘊藉甚深試政戶部使通州巡撫王公太倉  
州人知其材求爲州守州行田挈租重變海者  
賦如故他墾則侵于衛卒均之凡二千二百餘  
石 龍衣內官尉卒求艘橫甚治之編戍者五

時日本寇嘉定上海援之累有戰功寇州巡城  
立矢石間冠中二矢三關爲寇燬擊却之而出  
操江都御史渡海城屬邑崇明寇復大至開關  
納境外民及旁邑者數萬巡城昧爽隱几忽警  
而呼燭召將士雲梯數十乘及堞矣擊却之境  
內完且援崑山莫不多其賢勞當超遷以備兵  
操江都御史坐困太倉落職歸罪于公當御史  
逮士民泣不能留隨之逮所甚衆事白稍遷蘇  
州同知練鄉兵破寇二次賜金城福山以固郡

咽喉陞河南僉事轉副使居太倉備兵于蘇及  
松且督餉兼水利凡六年開太倉楊林河入于  
海崑山瓦浦入于江虹江自嘉定入上海注吳  
淞入海白茆自太湖入海大水請蠲數萬石城  
柘林川沙吳淞三堡請總兵軍吳淞游擊軍金  
山柘林川沙各置部將轄青材南漕材官皆關  
大計入浙會督府以密計禽渠魁王直又破寇  
于三沙白駒 賜金南都衛卒亂于是福山卒  
崇明吳淞客兵輒譟戮其首亂而撫之金山卒

求糧將圍御史于松公令開關不敢入就而解  
散焉陞雲南參政上官妻素儀稱兵請假以權  
攝州事而罷遷陝西按察使留平陽門霑益等  
寇之陝因昔忤御史左遷山東參政備兗東  
景國過之供帳而民不擾會河塞徐沛大司空  
衡命治之築堤遏沙河衝塞牛溝以南會薛河  
薛河高其防使淫之而泥善下降慶改元陞山  
東按察使加俸二級河功成也尋轉浙江右布  
政使是時會一本亂南越南越人都御史何公

以公請于部乃以右僉都御史開府六月兼程入境一本解會城圍去以舟師討之虎頭門遂大破諸縣山賊而撫其餘黨一本誘日本襲破碣石衛帛子所逼惠州一本于潮州公不俟援即日往惠州適參將部下殺將反攻城不克投日本遂行間今日本擒會殺其黨南贛援至討日本于平山追至碣石并叛卒盡滅之賜金幣力疾入潮會閩師討一本一本曾敗閩師于馬甘換茲閩稍勝輒敗諸將益懼公命縛

閩將乃死戰獲一本先是平張璉等執渠魁數人吳平逃於安南餘黨至是始平公疾革猶口授發兵給餉狀不及家事卒隆慶己巳七月二十四日也壽六十三潮昔未有開府皇皇至乃晏堵卒而奔號立祠于金山以一本功進右副都御史 賜金幣廕子入太學又以征日本功贈兵部左侍郎議諡今祀武昌郡縣鄉賢祠昔去蘇松太倉已立生祠則公之伐可不朽矣其文以號稱曰鏡湖集及撫越疏議已詳所履余

勒其最著于茲夫人荆府教授陳繼芳女也子  
二皆廩生熾補廕煥補太學生孫十履初有初  
如初迪初完初熾出復初篤初慎初嗣初正初  
煥出補弟子員四人孫女二熾煥各一銘曰烈  
烈開府史不勝書大者兵旅其次河渠生榮廟  
宇歸宜其居嗟夫有鬱斯所蓋昭茲來許者與  
明故中憲大夫福建按察司副使雨樓陸

公墓志銘

萬曆丙子夏公以福建按察司副使雨樓陸公

冬余以按察使入 覲丁丑轉右布政使于江  
西過家展墓公之孤四人奉其邑諫議嚴君狀  
來謁曰先大夫之喪賴明使君歸首丘故邈諸  
孤敢致遺命圖不朽余與公同舉而同官卒既  
周旋其事而于銘其曷辭公諱相儒大行其字  
雨樓別號也先爲吳興人出唐別駕陸侁之後  
國初有諱貞四者生彥祥由吳興徙嘉興彥祥  
生散官阜阜生儒官璧璧生封君潘配姚氏而  
生公公生之前夕封君夢鼓吹導金紫貴人至

其家故公岐嶷有奇徵而授博士書嘉靖庚子  
舉于鄉己未舉進士除營繕司主事視通州廠  
營 皇極殿徵材孔亟督發有程疊疊給將作  
不乏部運吏故有例金數千而革之 殆盡辛酉  
景府分封駕說潞河猝營 行宮而民不知擾  
大工告成尚書雷公將上狀公當晉秩二級而  
自言於雷公臣無狀願滿考貶封于二親不願  
亟遷秩有將薦改駕部俱辭壬戌以考最封父  
如已官母宜人尋轉都水員外進郎中管琉璃

河塘不越月而竣改督修蘆溝橋工鉅費廣而  
董者多以墨敗公獨皦然免于訾議尚書呂公  
歎曰陸郎冰清玉潔人也癸亥有易廠之 命  
廠故給 內宮薪炭歲課四十萬出自畿輔齊  
魯之區往往多豪右歲逋十六七主者率破產  
莫可支公行部籍豪右裁以法而定徵輸之限  
嚴逋負之禁民始息肩歲課乃登甲子陞知延  
平府北山賴中潭爲亂時議調兵勦之公力持  
撫之便而中潭面縛自首餘黨悉解公曰嗟夫

盜皆吾民今民病疫如盜何上書部使者行條  
編法而下其書諸郡民稱便已乃立鄉約清驛  
傳列河兵勸士右文郡中大治鄉書禮闈視他  
科爲盛戊辰以 覲考最進封父如已官母恭  
人復任者二載不以家從官舍蕭然而不以久  
淹爲念也已巳陞貴州兵備副使去而延民伐  
石爲記庚午適貴陽土酋安國亨拒命官軍討  
之不克聞公至百里外釋兵稽首願自新公尋  
以外艱去而國亨復叛明年下內艱甲戌服闋

除福建監軍副使兼攝驛傳綜核靡密而多所  
減省會有變條編法爲所堅執不果變時閩海  
未弭公督餉簡戎擇將領飭邊防而粵盜林鳳  
不敢闕乙亥夏島夷將入犯公遣材官逆于海  
有斬獲功閩人方倚爲重而公以勞以疾于六  
月十一日不起矣距生正德丙子二月十二日  
春秋六十有一配顧恭人先卒三十七年繼安  
爲吳恭人子鳴臯國子生娶中書主化女繼娶  
國子生計萬全女鳴陽邑庠生娶工部郎中孫



紹女繼娶庠生周采女鳴鳳邑庠生娶國子生  
馮敏效女繼娶封主事屠孟玄女鳴世聘國子  
生沈茂完女女二一適庠生張夢得一適庠生  
張世元孫男三人墓在某山之原負某面某以  
某月日葬嗟夫公狀恂恂而若不勝衣至其持  
論守經類能必行其志蓋其質行之樹于家鄉  
者素矣當伏枕時而語家人曰我當乞骸骨而  
歸臥雨樓之上矣可白長官為我圖之未幾大  
漸執蓮花一枝顧吳夫人曰我平生無瘡人者  
而清修其庶幾於是乎余遂為殮而歸櫬去門  
中民莫不哀過延津而慟者衆謂之全歸非邪  
故宜為之銘銘曰  
士重者廉嗟惟汝賢水部一麾厥守彌堅六年  
遺澤垂于延津護軍之伐昭茲七閩曷萃厥躬  
執掌之故閩中其恫延津孔慕首丘故山亦堂  
亦斧過者下車曰君子所

明封中憲大夫山東濟南府知府顧貞魏

先生墓志銘

先生諱正蒙字汝開蒲圻人也其先徙自沔陽而代有聞人至碧以處士稱二子舉鄉薦而爲邑令法爲樂安溶爲鄰水鄰水祀名宦語具楚紀稱質菴公先生父也母袁氏生子二伯正時有文學名仲正初舉鄉薦知蓬州遷長史季爲先生少從兩兄學蔚有文藝又工書得右軍法鄰水廉無美衣鮮食先生從之隱約若將終身居二親喪哀毀踰禮廬於墓次讀三國志至玄德關張恩若兄弟而歎曰友善且然况同胞乎

兄弟執書以泣不知涕之從出也蓋從兩兄居食三十年疾必躬嘗湯藥不以父母沒少衰初仲兄未舉子先生子奕方十歲遂遣從南游明年嫂氏就館卒先生乃爲輦乳婦乳之而召裳歸裳以庚戌進士爲比部尚書郎使人迎先生于邸而不往曰兒甫受事當報

主而翁無恙其勿念亡何裳有內之喪請急歸復迎先生辭如故也于是裳御母李恭人如京師恭人留媵奉先生巾櫛而就邸舍撫諸孫就

外傳歸輒夕爲澣衣旦衣以往而裳所雅素歷  
下李于鱗吳郡王元美京山高伯宗武昌吳明  
卿及中行間以好古相命恭人輒具酒炙縱裳  
交諸子驩如奉先生在御有雞鳴雜佩風甲寅  
恭人卒裳奉喪歸丁巳補北部郎戊午報政  
封先生如子官 贈母太恭人是年秋裳克江  
南使者讞諸郡獄過里門先生曰兒胡爲乎歸  
邪諸國郡獄日夜望使者可以老夫後事哉裳  
趣讞竣事疏上便省則後母方孺人卒壬戌春

裳起家知山東濟南府事癸亥先生如濟南裳  
適以公事遇于濟寧遂從登太山丈人峯與諸  
父汝尚弟表子樸如前爲壽濟南郡貳翟濤輩  
酌酒賦詩甚驩濤曰漢陳荀之會于斯而二矣  
遂名其巖曰德星爲文勒石李于鱗及諸士大  
夫爲賦岱宗奇祝先生曰吾登山適初度辱  
諸大夫祝信奇哉無何歸德濱臨邑諸守令各  
使人餽金道中先生曰吾不可以點賢子名謝  
不受乙丑裳上計京師遂報政而先生 封知

府 贈李母太恭人裳是年夏擢山西憲副奉  
勅潞安兵備分巡冀南便道歸省先生曰吾每  
誦曾子事君不忠非孝也有味乎其言兒久膝  
下如 簡書何未浹旬趣裳西至則大同兵事  
嚴矣尋罷歸先生曰兒今豈自適哉裳意得甚  
色養者五年而先生卒時隆慶己巳十二月二  
十一日也距生弘治戊午四月十七日享年七  
十二先生生平篤友義里中談裕中劉德章皆  
故交也談死而爲之殯數賑劉之遺孤內兄李

信玉無後裳送其二女其世具其趨人之急類如  
此然終未嘗有德色人其莫不稱長者而喜其食  
報于裳云子四長裳娶贈恭人劉氏續鄧氏封  
恭人裳震媵出年未齠女二媵出適廖欽字龔  
梓孫男四樸如舉鄉薦彬如邑學生次標如次  
樂如孫女二一適知府鄧廷猷子士達一聘咸  
寧趙氏曾孫三說訐諡裳筮于某年某月某日  
奉先生柩與李恭人合葬于某山之原需銘于  
中行亡何而裳逝矣嗟夫恭人窀穸則王元美

銘之先生歎曰辱名士言死且不朽中行不佞孰與元美第許先生之子久矣而敢負之九泉哉雖非名言其烏敢辭銘曰

為廉吏子蔬食終窶為廉吏父餽金弗顧既銘于岱而藏于楚矧茲恭人先歸為伍

明故封君北岡余先生墓志銘

按由余入秦其後以余為姓蓋散居三楚間南昌自宋邦佐顯明興東溪有給事洪石鎮有州守麟黃山有上元令韶接坡有蒲溪令棠岡

南有閩憲副曰德字德甫先生之伯子也滿三載當考先生貽之書曰我先世咸淳十年而三第乃遇非時今其時矣給諫公不及二千石而何幸及此我且老宜歸德甫遂具休疏會有疆事弗敢上而循吏奏最當得封則歸養屬虜警停請忽中飛語罷先生所稱封君德甫三載刑部郎所考也德甫歸而跽謝曰曰德無狀不能屢封大人奈何先生歎曰昔以趨而歸我以白衣衣繡秩過于給諫公足矣矧而待我餘年乎

迨中行至南昌先生沒五載而戒庵窆謁銘宗  
室用晦爲狀具先生頗詳不詳德甫所由罷蓋  
其中飛語以嚴相胄子之妻黨也新安汪伯玉  
嘗頗序其故然知之莫深於中行昔與德甫爲  
同舍郎當同出使故事辭相府而行嚴相愕然  
曰里人多稱余君賢何嚮者之不左顧也中行  
出以告司寇海鹽鄭公公賢而屢稱之旣聞于  
羣紳間章章矣蓋爲郎七載而乃得憲副于相  
何與焉當相罷而從之豈非命也哉豈非命也

哉先生善言命知不當再封故趣之歸而徵之  
先世云其先自邦佐生必登由黃山徙武陽里  
五傳入 國初有仕節仕節生孟紳徙岡南生  
子良子良生泰稱訥菴公娶閭溪羅氏生先生  
名敘字良倫避祖諱改字仲倫世以尚書隱居  
教授先生少從父學學憲北地李獻吉試高第  
補博士弟子未上會父爲里豪所誣推莫能對  
狀乃出以代頌繫二年事白業廢而產益旁落  
則以教授自給門下多名士武昌侍郎朱公爲

御史時聘塾其子而相友善先生言命踰五十  
當貴朱公然之第既罷業所貴之謂何及見德  
甫文而大喜曰師所以貴者在此子也德甫尋  
列博士弟子高第從教授者四至束脩足佐朝  
夕具母喪勿有悔先生無勞于拮据矣逾五十  
而嘉靖丙午德甫舉鄉薦庚戌成進士以言命  
旣徵乃愈務挹損比初受封德甫飭冠服而進  
一再試輒筇之曰以而顯我足矣我野服良便  
也時歷下李于鱗吳郡王元美爲刑部郎而倡

古聲詩德甫與武昌吳明卿廣陵宗子相南海  
梁公實蜀中張肖甫及中行爲同年友游從其  
間甚驩先生喜曰大江以西唱自北地僅得熊  
士選者稍與之同聲耳時我以家難而不登李  
君門命也今有六七君子視李君多矣兒幸與  
之游而圖不朽盛事所以顯我者其必在斯乎  
迨德甫使治兩浙獄歸過家起居上平反狀先  
生益喜出筇中衣置酒高會父老而勞之曰漢  
于公一獄吏陰德與其後今平及數百子孫其

庶幾乎德甫至閩以其海錯絲枲為壽先生

澤曰我所習者褐衣芋栗耳自是問安否不敢有所侑比歸先生迎而謂之曰三載之奉我未嘗再享今橐則垂矣我不為廉吏父乎而為吏者何慊也于是德甫安意明農于畝甘其養至家堂災歷八載歲久不能葺弗問向所游六七君子者多屏居故里時時尺牘詩什相慰存先生聞手之曰兒得與齊名我死可無憾矣先生好賦詩第取適意爾於德甫詩始彈射而終激

賞之父子竊相樂而慈孝風里閭為鄉飲賓二十餘不數數赴其履城市則可數也德甫侍養十一年矣萬曆癸酉元美為作余翁傳稱其寬中少伎素供絕醲宜壽顧是年正月無恙而語德甫曰我氣少短殆將終矣迄三月朔疾作踰四日整衣冠而逝距生弘治壬子正月初九日蓋年八十二矣配萬氏里中處士宗元女贈太安人先卒三十二年繼娶蔣氏無出子二皆萬出也伯憲副娶進賢李氏封安人仲曰徵郡學



生娶同邑徐氏又王氏女一嫁同邑吳一夔孫  
男八斐槃槃樂其一幼俱憲副出臬槃采俱曰  
徵出而斐槃俱博士弟子孫女二人曾孫二燿  
斐出臬出者幼曾孫女二先生所謂子孫庶幾  
當不下于公之門矣葬于新阡丁丑十一月二  
十六日也銘曰

封君之封纍纍而然維崇令德加于人維考終  
命全于天維有子文獻而傳斯爲余先生之所

明故中順大夫青州府知府璉川施公暨

配安人沈氏合葬墓志銘

嗚呼公卒四年而葬孤以奉化令徐伯臣狀謁  
而余未之銘今十有二年矣每展狀欷歔而傷  
其有所隱也日者孤復有請而因發予之所聞  
當公除青州卽以京考罷罷者多名流而公與  
司考郎爲同年進士郎自倨其有公獨夷視之  
故嗛北道御史臺言南考不當狀上以制不可  
更而降郎調外任郎後遷浙臬憚公莊降禮公  
視之藐如亦未嘗與較郎竟以考罷而後死于

公既各有定論其視公何如公今可釋恨于郎  
而余斯爲之銘矣公諱峻字平叔歸安人也其  
先施氏著吳興唐宋多名賢元通甫生彥明彥  
明生士良子謙知閩永安縣祀于名宦祠永安  
子瑄生封刑部主事鏗娶封安人董氏生公公  
幼峯寄遇事敢任祖龍爲豪侵以諸生而力復  
之比舉于鄉卒業南雍有鄒夢鶴註誤當司以  
其父總制三邊故置于法後莫敢出公每痛其  
莫之反也比乙未成進士授南京刑部廣西司  
主事遷至郎中以曉暢典刑而掌封事科尚書  
聞莊簡公凡難事務平亭公剛毅自持當堅決  
莫敢撓京兆叅軍鄧鶚托城社而墨久矣人謂  
不可問公竟致于法于鄒夢鶴則必平反之既  
不畏強禦又不避嫌如此凡議有不合卽欲投  
劾去上官第陽聽之而僚輩因將甘心矣且性  
少愛獨好聲詩每謂詩至唐亦千古之良也至  
于明經興則固失之千里乃間有爲之亦惟資  
之所近焉耳其於格調體裁邈哉未之講在僚

輦間儼然以詩自重或不中程度直以意彈射  
之復不能容人短長每面折而多不堪其出青  
州蓋麾之矣不至顛擠憾未釋也公歸不與公  
事視里中閭閻若邑屋而不爲屈間至郡閣與  
會當座而短長之不屑與之往返莫不憚其莊  
城居樓如斗典籍敦彝甚具署之曰甲秀非莫  
逆不與登余與伯臣及曹僉憲子有俞檢校德  
音則嘗過飲之不啻五城十二樓之爲樂也城  
外峴山浮玉諸勝余輩則嘗從之游其別業秀  
而野環城之鉅麗者皆不及其雅致每引詞客  
對酒多與逢掖隱淪亢禮引上座初肅入戶輒  
手所作而揖曰幸爲不佞彈射客有請者亦然  
彈射訖乃飲或自歌其詩而輒酣呼逾快也蓋  
庶幾乎嵇阮之風矣自言詩外不問家人產於  
族疏屬食指雖衆而必使有所沾及置田以贍  
其貧產田僅給饘粥第令多種秫毋闕吾對客  
具客至不戒而辦莫不靜嘉各盡醉而歸沈安  
人之所佐也公以是優游而遂其志意安人之

劬勞因是有聞焉公昔夢有繫之者言其不滿六尺而每笑曰吾其不杖於鄉乎生平無他病病而強半爲醒耳至病革矣家人治木而竊繫之公覺而歎天年終矣卒于辛酉夏五月之閏廿有二日距生弘治乙丑正月十四日享年五十有七安人少三歲後公一年而卒子男三長邑庠生于家有雋才娶于沐陽簿曹氏及季于宙俱穎而早卒次于官娶武進楊氏今爲國子生女五人長適陸京兆珩孫國子生元方次適

沈憲長宏男國子生如封次適張尙書永明男舉人天德次適布政司經歷茅良男庠生一龍次適光祿寺署丞李一夔男太學生存孫男三孫女六公既不問家人產歲時男女饋粥大率出安人居多甲子合葬清風阡公有璉川集行世以其別號而名也王元美嘗稱之以如築室器物俱完爲善締構自成一家云然其間神氣逸邁則如其人之崟崟焉或病公好彈射人豈溫柔敦厚之教哉余質之雅道其何傷于公古

稱惡惡如巷伯乃寺人孟子之所作而今凡百君子則皆敬而聽之彼何人斯其非伯仲如貫者乎而蘇公之斥暴未嘗刪于三百篇則得情性之正者顧惟所感焉耳豈若世靡曼而比于鄭衛之音者輒以傳于詩教然則孟子蘇公非邪余重有感焉而取諸詩以爲銘銘曰  
彼其之子邦之司直言旋言歸其詩孔碩我有酒食且以求日歸于其居宜其家室

劉太安人墓志銘

太安人中丞劉景韶母也中丞自鳳陽奔計歸崇陽卜葬不吉改卜寶山痛不及視舍啓棺更歛如生以隆慶己巳五月六日葬焉姪通政使汪公宗元爲謁銘具狀按太安人名妙靜字莊穆父處士潭潭從兄爲封都御史三子皆貴中子爲廷尉太安人兄弟也卜者謂潭其後必有貴徵當在次女矣潭必慎所許封員外公縉配甘氏不宜子再儀太安人以其家而難爲詞潭兄之妻劉氏也因以告而許之爲公之賢當以

子貴焉歸四年中丞生時君舅君姑咸嚴治饌以進或恐不宜栗栗闕隙中俟一再下箸始退舅姑初以其家當不能勞苦顧先平明而起乞宿夜不休以故得承歡心公得顓治業其教中丞幼卽令與內則合辟呬詔古典口授之成誦雖就外傳歸必坐之瓦側篝燈而讀或炳薪以繼督過之不少貸中丞嘉靖庚子舉于鄉或諷兒當富貴母勤其少休矣謝曰兒能得官官爲國耳何以家爲而俾我躬處休邪甲辰中丞

登進士拜潮陽令戒之行曰女不記兒時怨家窟女祖及女名文狀中乎邑捕逮急夜攜女荆榛中對泣不啜及哉今慎勿枉人爲也故令稱平擢刑部主事有虜警守關請納避寇者萬衆亦不忘荆榛中及之潮陽時母言也由是有能名晉兵部員外歲癸丑上功封父母太安人禮成惟御素所服志不忘儉焉未幾中丞出貴州僉事時論屈之勸其謝官太安人叱之曰男子生而四方何有貴州哉乃往晉叅議治苗夷有

功晉副使防江北逐烏夷甫奏捷爲太安人病  
具疏乞歸養太安人走使止之曰淮海苦兵久  
矣第爲滅賊計以拯民于荼毒紓

當宁南顧憂我斯勿藥矣疏不果上超遷按察  
使尋又以江南捷擢中丞督撫鳳陽當積苦兵  
間太安人豈不私爲子憐也乃所風勵達大體  
如此每爲羣生請命祝天蚤滅寇寇平而卒嘉  
靖辛酉三月二十三日也距生弘治辛亥一月  
十一日壽七十一與甘氏太安人處二十年無

違言事員外公四十八年公操切如束濕立辦  
應之無失脫不厭意于公者就處率無言去惟  
嚴不容人過女曹控不平莫不中肯綮一二言  
解也故稱女士成子以賢勞顯子獨中丞婦封  
安人張氏孫日孚以功授武昌衛指揮僉事世  
襲婦戴氏封恭人曾孫衡聘汪氏銘曰  
桓桓中丞南國之紀天鰲女士厥有本始寶山  
之原允首巽趾寔協坤輿陰德以美

天目先生集卷之十六

天目先生集卷之十七

吳興徐中行子與 著

傳

篁溪鄭先生傳

先生名廷鵠字元侍瓊州衛人也遠祖泰汴人  
紹興中以進士判湖州遂家德清其裔通者洪  
武初謫戍于瓊求樂間奉例挈諸子及孫彪等  
歸留長子在營歷三世無鬪彪子籥籥子順宗  
來代子文從之娶俞氏生生少警敏稍長好



天門先生集卷之二十一  
個儻時戍役旁午每感泣泫勵年十五受易于  
海先生聞其講德遂大發憤爲所奇許長女越  
六年嘉靖戊子舉于鄉娶之戊戌舉進士第三  
人服海先生知人授工部都水司主事卽上便  
宜司空蔣公奇其有經濟才居三年悉心經理  
閹豎及目不敢干以私以父艱去爲母家立後  
起復補禮部儀制司主事滿考贈封父母尋給  
事吏科轉工科以京師地震條陳黃花鎮古北  
口潮河川俱京師後門屬者設石匣營恐城孤

力薄請遣司馬門侍郎督之築關城增水壘夏  
澇庶不爲齧秋高虜亡所乘貴州地連三藩勢  
不統一總督巡撫不兩置置一控三重其權于  
法便且省費京師草場并御馬等稍入領之者  
率歲遷因以滋弊願三年爲限蘇松等郡以財  
賦雄天下乞專設叅藩董而責成之四者皆國  
大計也庚戌當大計吏疏皆手出以公正稱又  
論三塗取士及黎情諸疏無慮數十上然大都  
類此矣爲會試同考官能多得士主試相國張

公稱之陞江西督學副使江西故劇而督學尤  
難周密章程誦生歛然宗之欲請託者輒止增  
白鹿洞學田立條貫修洞志更定儒先經祠考  
滿轉參政以母老乞終養居石湖爲娛母卒服  
闋御史大夫御史交薦之性剛介歷官屏居闕  
于謝問竟臥不起其學以正心術謹質行爲大  
致不詭以要名出其門者皆畏公議慎檢押文  
以意爲主而矩矱較然也著數十種凡百有餘  
卷經則易禮春秋諸編他若都水蘭省掖垣學

臺石湖所撰瓊志修于癸亥之夏秋卒未卒業  
其辨漢史朱崖郡罷而未棄罷郡時尚有朱盧  
縣仍隸合浦郡漢詔猶存其綜核大抵然也初  
以伯之子儒爲嗣可世其家學庶子二曰化曰  
似徐中行曰先生以德清有篁溪爲號計偕三  
上南宮皆由浙西展墓蓋不忘本云余其旁邑  
後進庚戌辱爲門下士故能詳其家世入瓊者  
善醫術調賙貧乏死無所歸殯之葬之所居至  
今稱爲鄭公福地及攜四子四孫歸蕃衍于湖

而其一入瓊食報于先生父每示以孤楸曰汝知一本故乎因悟仁孝之義記之故學得其大者余於其庸庸不具

### 杜季子傳

杜季子者杜長公之季子也長公爲邑功曹同曹疫諸曹以其妾故引長公避之長公必往必有所與俱執火竟夕爲傳七劑而以達節稱是長公之行也長公有三子當爲廣西龍江驛丞獨以季子從鄰女以杜男子少好奔焉拒之由

是人多季子當廣西急軍興驛之旣廩賓蒙所出代父祇役孤身豺虎窟穴出數百里外督課徭感其意而輸之以濟蓋長公長者雖爲驛乎大官輒器之使覆殺人獄敢與太守亢幕府征蠻交檄從軍皆恃季子在季子能子也有是能子不難于幹蠱而難陰德如其父是季子之所難能焉者長公卒于驛哀毀衾舍如禮徭俗中以爲異比護喪而舟也有喪父者求附焉惻然問之其櫬在邸而却之曰如汝父何恐舟沉汝



鶚字薦夫西臯其別號也鄞人卒年八十有二  
子思自青州爲湖廣副使以人言歸而喜遂奉  
終其天年葬于鳳凰九曲之陽

徐季子曰杜季子爲太公矣而余爲通家子當  
稱爲太公然季子自拒龍江鄰女其行已聞于  
世里閭喜稱其少年事故亦從而季子之則長  
公益顯而杜氏之德遠矣

### 樗園公傳

樗園公者歙長源程氏人也初以菴堂而號晴

臯居士其後辟園當珠樹之塢顛嘗產芝蓋有  
玉芝亭焉或曰珠園或曰芝園有蕘豎輩譌呼  
爲樗園則獨引而稱之或亦呼爲樗園公云其  
園皆嘉樹里客多譽之謂其樗仁有而名之仁  
當也公迨然曰辱客之雅旣竊美名多矣茲重  
命之敢不拜嘉第芝乃間產而珠亦奇稱耳不  
如樗也吾寔有焉吾少頗任俠喜以材自多客  
游吳越燕趙齊魯之間好結納賢人長者魯王  
聞吾名召爲引禮舍人以非吾好棄去而爲漆

園之游日徵里父老爲驪而俠心未亡子弟多  
誦義竟非吾好也今皆儻然而曲直任之矣能  
以吾之踈散爲之繩墨哉第樗吾園而未樗吾  
里昔之樗里子何其多智也今吾行年七十所  
而暇及於斯乎吾不知其爲莧表吾不知其爲  
寢丘吾安知後百歲渭南章臺何如也且呼雪  
洞雲鳥之石爲愚而寓意焉爰處頤室爰居高  
風堂而或憇于新甫亭過玄玄齋偃仰徐于而  
登松竺館以望松蘿金竺之勝入萬花林翛然  
臺三台南辛之爽而延之咫尺矣前有大鄣之  
奇石壘爲道家山每長嘯于此挹禪月池而酌  
客攜客以撫古松而登玉芝左白岳右黃山天  
都諸峯如步障其岡壠皆几席下歲隄而步霞  
佩樓其振佩仙仙如也環園之佳卉蒼蔚走鼠  
鳴鳥千百爲友皆清輝之娛賞心之具焉故有  
軒就而著園書五帙

徐中行曰余嘗使新安聞有累捐千金佐縣官  
費如廣陵河西及邑之于垣又繕宗祠友于四

兄弟居廬繹紫陽家言爲讀禮考嘗護同舟游  
醇卿之沒殯而收其遺文焉匪直誼高亦材具  
也今乃知爲樛園公卽斯園蓋非苟然者矣而  
視之樛里子何如邪公名淳字德厚其季子懋  
易亦才士也與余善而樂傳其事

### 馬夫人傳

夫人任氏馬司徒公夫人也其先皆唐末自光  
州入閩馬後移居閩中城任世東里之君山有  
山陽令者求樂間爲良吏其後業儒夫人父綱

倣儻里中呼爲任翁獨多公贈大夫長者同爲  
諸生交引重任翁有二男每歎其不如公獨心  
負息女而足以伉儷焉夫人幼慧受女紅輒解  
雖盛寒暑不廢里中有齧觥奇戲妨輩召之往  
觀儼然對曰琛聞之矣越閨失度輟業失職矧  
而觀如禮何固辭任翁重之以贈大夫求卽諾  
十八于歸夫子就外傳舅姑器新婦命以家事  
輒無違命綜理甚詳於米鹽纖嗇而伏臘必腆  
贈大夫急施予且喜賓朋宴集嫡姑李夫人爲

脫簪珥殆盡夫人願佐之故得李夫人驩公計  
偕北上舅及嫡姑踰月繼卒傾奩治喪不告妯  
娒公歸艱葬事壹切夫人所襄也公登進士家  
召賀客有請歌舞爲驩何太夫人曰否否兒森  
素約亦將有所樹耳聞之母乃蹙乎客知白自  
夫人爲其賢而有禮從公爲郎甚儉以佐公廉  
當 覃恩稱安人公守姑孰歲歉忘寢食不內  
顧夫人課童蒔蔬而躬紉絲枲旬月不外市人  
若不聞守之有家也公爲江右觀察使夫人脫

簪珥而將長女矣乃歎如諸女何矧且歸老乎  
辭返理故業壹不異於微時有言尙書家願予  
女子熒夫人謝曰我家宦薄敢逆女于高門乎  
竟屬公之貧交有道州大夫也迨爲子熒納世  
尙書林公女或問之夫人曰匪以其盛爲清白  
耳倘天大吾後儀刑不在茲乎所爲四女治奩  
皆不及中人家每戒之曰吾昔嫁書生今汝輩  
公子同歸慎勿以爲儉吾厚汝輩多矣當公爲  
方伯擇姬從太夫人往公轉巡撫夫人從之閱



歲而曰今歸老亦足矣但如諸子饘粥何遂辭  
返倭寇至登陴久者嗷嗷夫人罄歲入以給及  
乎鄰里之乏者窮閭莫不誦德焉熒以公廩當  
入太學不忍離夫人遣之曰汝受邑博士業吾  
輒咕咕而喜况

君命游太學其敢不亟往乎夫人晚舉子而蓄  
之甚莊國學貴游多熒文雅或嘲其短於奕及  
不聽佳冶之曲熒解之曰奕少頗善之而枰爲  
老母碎久矣且不敢理絲竹而今安知此音者

乎故翩翩然多夫人之教也夫人疾作尙治家  
事諸女婦請且休而遂不起矣將卒語熒曰吾  
三十五年而儉勤如一日以佐君子爲清白吏  
無恨第老姑長子在萬里不及訣而汝未冠二  
庶弟不及見之奈何復恐葬非燥壤且將多盜  
寧勿封幸合葬而封稍如制可也時公爲少司  
徒稱淑人卒更衣其布袍十年所矣故摺紳頌  
夫人而善內子職云嗟乎若飼守陴而戒厚葬  
寧不矯然達丈夫之節哉且公慎于政外家將

有托輒爲夫人所止其莊如此性乃固然抑習之公平卒之八年爲隆慶改元以公行在司徒贈夫人次年公入爲司徒而仍錫夫人之命論曰余聞夫人幼時有相其當貴而去任翁步之不見竊喜以爲奇徵翁善堪輿家馬公父母其所葬且預視怡山而以葬夫人卜習言未有艾詩不云乎天立厥配受命旣固此之謂也

### 僕生傳

僕生者郭主事僕也主事字子長閩中福唐人

祖處士娶北嶺林氏出父爲秀才初以戚屬貧女媵招游乙爲壻不以奴畜之以之事秀才其叔出側室乙不爲之下從秀才之尤溪授經館里社以秀才敬神而糞除惟謹歸疾俱篤乙甦泣曰嗟嗟秀才奈何舍我去乎蓋夢見舊館社其左右鬼來逆旗鼓鬪以秀才代其主也乙強從之登舟鬼投乙于岸去矣頃之秀才卒乃信乙不誣子長旣孤乙憤其叔欺寡或至於面譙叔將笞之不受遂棄處士分產攜妻及四子

去時子長年十三自外歸遇之抱首哭曰爾忍  
棄我嫡孤以不能爲若主乎乃不忍而同歸約  
子長有室去比子長室盧氏亡何族與鄰里閔  
殺人爲所訟者咸匿子長及乙不爲訟乙恐再  
及因辭去子長爲母病閉戶避閣上以撞戶驚  
母自投下就繫盧翁以衆要於路捕者知其名  
亡當適乙挺身追及易之縣以爲質管鉗甚酷  
待爲訟者至免尋以獄疫而卒其族連死甚衆  
子長非乙無幸矣迨子長仕貧而早卒不能厚

視乙諸子囑盧氏爲主母撫之乃育其諸子之  
孤以生事公子生善食灰炭屢笞之乃止及冠  
長幹而強項喜手搏檣蒲乃聽其應募從海戍  
吳越大兵潰賊逐急空拳拔樹抵賊驚不敢追  
嘉靖乙卯其年二十四而歸島夷初犯閩入海  
口鎮倉皇而避主母入鎮東城二公子入田舍  
去城二十里許賊屯三月餘生嘗往來其間踰  
垣以餉主母城中驚服其壯以之爲部兵日戰  
克先鋒追奔千里無劔奪得賊物多卽隨手博

盡後以兵糧乏歸策羸爲傭主母時避于縣城  
去海口二十里許戊午縣城猝陷生自海口質  
羸僅半值云家有死者以此收之聞被虜率廝  
輿吾公子豈堪此則投賊而代之人咸笑其愚  
徑以挺赴城遇三酋據橋脫次日再至賊去知  
主母蚤脫及公子家屬在入門不對泣而仰天  
大笑已而伏地大哭蓋喜全而傷危也有骨肉  
爲虜者聞其據橋勇傭之尾賊以贖爭多與直  
而行未及百里聞賊再至卽還直夜歸負公子  
嬰兒而扶主母山谷間關四旬乃抵郡城爲  
娶妻甫有孕有司聞其名募之不得辭主將因  
敗圖贖知其勇而鼓之寄語感主將恩公子知  
其不免矣至惠安以先鋒殺五賊斬二首結其  
髮負于頸伏起衆潰賊憤竝圍之力殺賊而傷  
爲縛于樹叢矢亂刃膚無寸完者賊去往收糜  
爛矣計至主母爲慟招魂而葬命公子祭之而  
善視其妻以撫孤兒兒殤乙之諸孫仲季者在  
徐季子曰侯生次公子余門人建初也每言生

輒流涕倘有天幸當如衛將軍無幸而爲百戶  
長亦當廟享錄孤矣以爲人奴乃爾安得史爲  
之記哉且追語乙涕泗不能止嗟乎世有是夫  
而念之不涕乎故余記之敢告僕臣

天目先生集卷之十七

祭文

吳興徐中行子與 著

祭宗子相文

何夫君之好姱兮發靈異於帝鄉湧珊瑚於溟  
渤兮襲玄珠於射陽荃既有此內美兮又服之  
以琳琅冠切雲之崔嵬兮撫長鋏以周章紉秋  
蘭以克佩兮羌獨異乎衆芳遂冲年而鬱起兮  
勵高羽於長揚乘青雲以翱翔兮固時俗之所

慕乃獨與余目成兮共抒情於毫素曰麟鳳之  
文明兮夫寧有取於馳騫因結蘭於吾黨兮齊  
玉轡於廣路指九天以爲正兮振千古之高步  
窺輪扁之巧心兮諧師涓之神悟揮斤八極兮  
逾橫絕而不顧寒韶護之獨奏兮反俚耳之驚  
怖掩蛾眉以深藏兮倏衆女之興妬荃故好夫  
遠游兮曾捐佩於安期知天路之嶮巖兮遂弭  
節於武夷懷鬱結而未通兮因發憤以陳詞將  
奇思之凌厲兮紛電激而風馳况仙樂兮縹緲

又霞章兮陸離既托言兮垂世遂委蛻而無疑  
獨詠懷兮臨絕猶遠貽兮所思豈歲星之大隱  
聊玩世而游嬉羌長庚之斲謫遺文采而去之  
况幽通於太乙兮降赤龍而迎女駕日月以爲  
車兮叱雷霆以爲御萬靈奉轂兮命文昌以後  
旅凌天地以徑度兮復上歸於帝所余猶憶仲  
春之夕兮數見夢於中山荃被髮而長嘯兮云  
遠往乎崆峒及發懷中之尺素兮疑解組而相  
從余方倚天目而延佇兮俄雨雪之告凶聞靈

輻之將至今極狂走而相迎望丹旄之宛宛兮  
橫大江以揚靈恍雲霓兮燦爛儼精爽兮可憑  
願一見兮道意忽風雨兮冥冥舟容與而不去  
兮若眷眷於予情懷瓊糈而要之兮冀昭格以  
告吾之精誠傷心知之委謝兮余獨胡爲乎久  
生擬投珥而從游兮惜脩名之未成惟夫君之  
好我兮復何間於幽明願翼我以卒業兮庶不  
負於同盟

祭南陽嵇公文

矯矯嵇宗系自中散龍性嶽立超彼世觀濟美  
侍中以身爲捍血濺朱輪氣振霄漢迨宋南渡  
賢哲雲仍曰存仁者義問蒸蒸肇遷餘不占籍  
吳興奕世戴德發祥郟丞維彼郟丞行兼儒俠  
兄事董賈弟畜荆聶散金收書遜志鼓篋篤生  
嵇公鬱起中葉公雖冲年勃勃英氣下帷發憤  
廣探精詣屢賞文衡業已名世何哉數奇竟乖  
一第身雖不達殊操振俗父也被誣陷之刑戮  
竊負亡命用奇脫獄挺節凌霜懷才沈陸摺弁

交稱公益引晦鞠躬好修困窮不廢哲嗣誥誥  
義方是誨燕翼貽安永錫爾類質貢迫期邑方  
勸駕公也翩然揮手遜謝脫蹠榮名畢志婚嫁  
龍臥南陽庶幾叔夜伯子延祖鶴立靡羣談詩  
匡鼎待對終軍方圖鳳舉媲美前勳公胡仙逝  
乘彼白雲日墮虞淵揮戈靡及痛甚諸孤長號  
雨泣行附通家義均休戚薄奠一卮豈勝於邑

祭少司寇涇川衛公文

於皇康叔肇封于衛巖巖亞卿維其苗裔天祚

明德公侯來復篤生元幹光踐初服篤生維何  
降神嵩嶽甫自冲年英聲卓犖奏對漢廷賈生  
籍甚詎曰少年壯猷丕振爰訊于楚甘棠攸憩  
操法惟允豪右讜氣入居諫垣蹇蹇庭直一言  
迴輿功在社稷抑笮稱兵嘯衆阻山崇朝  
底定威申百蠻開府江漢江漢載清南冠立出  
峴首垂名考牧滁陽我馬臧矣賓於太常日嚴  
三禮揆留皇鑒迺弼士師明明憲墨臣寔執  
之終始正直七命滋恭盛年嘉遯高朗令終天



不愍遺喪茲黃髮賻恤追崇式旌君伐矯矯二  
龍天府嗣登衛多君子洵也有數淵蘊耿懷疇  
云已究樹德不某等小子義屬通  
家典刑綿邈于何不嗟廖廖莊士國是攸司銜  
哀申奠登曰我私

祭大廷尉葛公文

奕奕始祖作賓于吳嘉名曰系服寵鴻臚爰及  
稚川訪道方壺侯封啓土牛斗之虛天祚明德  
式復其初篤生大理蚤握璠璣經傳劉向賦擬  
相如弱齡高舉與衆殊趨展猷赤縣抗疏青蒲  
虎尾載蹈狼跋其胡惟

帝念忠寵錫銅符蜚聲藩臬振武番禺入爲名  
卿考牧留都秉心塞淵駉牝竝驅司理兩京克  
慎爰書操法平允接軌張于朝方聽履公也縣  
車辭榮金馬乞身鏡湖維茲元老擅美中區法  
匪純吏學則通儒直諫似韃拙宦若愚醇謹萬  
石知幾二疏壽儕衛武隱類陶朱况也餘慶接  
武天衢公亦何憾樂哉玄廬惜矣老成望重黃

樞台垣中圻朝野嗟呼春風月日實惠吾徒大  
邦彝典今也則無眷言拱木遙奠生芻幽明永  
畢思往神徂

祭司空顧箬翁文

倚歟達尊蔚爲儒宗人倫品鑒甄拔章縫余幼  
承婚仕同于公西曹矯矯海內人龍俾附不朽  
伊誰之功寵溢瓊玖誼重景鍾匪以爲報于心  
有冲載瞻遺像廟貌攸崇薄將清酒以寫我衷

祭臧茗泉文

昔稱同盟壇坫誰雄執耳載書君寔厥宗余徵  
寵靈鞭弭先從載馳載驅若塞若通君守縫掖  
而貢辟雍五十乃薦三上南宮文矣則優命也  
靡逢遙授冠袍侈于素封未幾而逝彼蒼夢夢  
賦此內美曷不昭融臧氏甲科曰有長公君之  
令聞奕奕攸同矧惟諸子靈秀孔鍾爾名旣盛  
爾後則豐弛而必張天道若弓豈謂昌阜未丁  
厥躬感念疇昔白駒匪東桑榆云暮愴爾悲風  
將一束以寫我衷山河雖邈眷此遺踪

祭郡伯姚石林文

君壯而舉名流翩翩遵晦潛伏二十九年乃登  
甲第翺翔且遠百里靖共戴星獨賢緝盜安萌  
奉嘗而傳稍轉比部伉直以遷一麾未入驅車  
言旋杜門却掃斗室蕭然清酒嘉客色笑几筵  
耆齡載育神王乃全耆而往矣胡不仙仙余自  
元載未夜踰蹶願言重違今也未捐日月云邈  
如彼逝川涓滴斯須傾于九泉

祭陳獅岡方伯文

繫生才之不偶兮雖古以爲難當 明時之誕  
降兮匪光岳其孰完猗嗟公之矯矯兮譬騷衷  
之與雲鸞騁絕塵之逸足兮抱冲漢之脩翰爰  
乘時以拔茅兮肆濟濟而彈冠自通籍於金馬  
兮歲荏苒其三紀當仕途之炙手兮盍澹澹其  
如水豈伉儷以取名兮奈姘妯之可恥斯邈焉  
其鮮儔兮宜一日而千里顧總總以長年兮積  
資勞而迤邐彼伊人之高曠兮猶孤憤于積薪  
獨條然其容與兮甘陸沉以葆真惟渺躬之偃

蹇兮亦踽踽以寡親曾傾蓋于郎署兮謂若友  
乎古之人公亦不我迂兮時枉駕而接鄰暨司  
藩于滇南兮幸叅陪于末議若龍劔之復合兮  
爰同心而交臂迨求章于神都兮公屬詞以見  
示每捧誦而三歎兮誦如貫之高誼嗟人生之  
離合兮夫何異乎飄蓬儵相值于殊方兮蓋不  
知其所從奚睽違而契闊兮戒秋而申以杪冬  
乃若客歲之仲夏兮謬承乏于茲土適公之入  
計兮得聚首于故里冀晤語之可常兮或破余  
之踈鹵何計音之忽臨兮使余心其獨苦概窮  
宇之標季兮曾相知之幾何悲哲人之日以遠  
兮悼末路之日波敬擣辭以洒涕兮乘高風而  
悲歌倘中道而有航兮魂恍惚而來過

祭慚烏李公暨楊碩人文

奕奕仙踪維周柱史爰逮金陵徙于箬里發祥  
徵君秀自穉齒甫晬而孤依于外氏如漚者身  
如綫者祀邁迹亢宗克復其始族有藐姑靡怙  
靡恃犯衆力扶竟存祭主道有遺金完囊以俟

客取如攜君還若委里有誣盜獄詞具矣奮身  
援解竟脫株累瓦礫視金泰山視義志在急人  
不必爲已痛父蚤亡身不逮事賦詩慚烏悲號  
靡已孝洽宗祊名高閭里固謝賓筵韜光城市  
婉婉碩人蚤窺圖史誕自清門歸于吉士禮肅  
采蘋思覃葛藟琴瑟允諧家聲濟美濟美者何  
篤生令子振藻東吳揚標南紀雲豹雖藏雲龍  
終起維昔龐公竝耕漢水身雖弗章子也膺仕  
上下千秋庶幾可擬矧也耄期竝膺遐祉偕隱  
齊年錫類已侈有德弗亡有子弗死重以田公  
墓文如綺

祭方聽泉年文文

惟公詞林俊望江左魁竒公車高薦矯首雲達  
余忝附驥傾蓋而知公初釋褐試政郎署爰佐  
度支瞿瞿長慮出守瑞州端方仁恕豪右兢兢  
漑我黎庶歷官五載鴈行而前滇南兵憲借箸  
籌邊威聲翕赫貝錦流傳叅藩豈異忽而左遷  
黃金可銷白璧易點貴陽之濱歲華荏苒天寧

人勝瑜豈瑕掩市虎成空公亦何忝遂徒今職  
主餉閩中維是餉署寔余所官余職多曠幸代  
者公成余不逮爰克有終年誼方殷同官伊邇  
清樾亭開銜盃未已榮枯倚伏誰測其以慶者  
出閭吊者在里惟古有記收於桑榆公適騰起  
遽返舊都同袍飲泣良友則亡旅魂縹緲靈輜  
戒塗公既九泉余鬢亦斑交情二紀流水潺湲  
薄言陳愬有淚其潛黃山白岳魂兮來還

祭潘中丞令兄文

嗚呼惟靈崛起吳興黌宮振厲藝苑憑陵仲叔  
及季棣萼相承長公是友矩矱準繩駢駢四牡  
龍變雲蒸公維赤幟誓以先登豈謂三讓諸弟  
乃升晚偕計吏貢于王庭臨軒高等重席橫  
經奕奕皇畿肅肅儀刑聞問孔昭令宰是膺  
桂陽良牧百里稱平絃歌載道爾書用旌爰  
棄百姓計于洪城惟茲開府夙厚天倫天胡不  
憇奪我伯兄靈輜至止涕泗哀鳴某等感愴罔  
不沾纓芝焚蕙歇胡其爲情潘湖浩汗匡山崢

嶸夜瞻牛斗劍氣縱橫星言出祖歸于九京敢  
具楚醴藉以江蘅臨風一奠有淚如傾

祭顏給舍父文

顏氏之先爰有克國教自孔門世遵隱德燁彼  
通籍允爲世則於維先生家庭翼翼旣敦質行  
允茂學殖聖訓是躬義方是力展矣令子克岐  
克嶷明經起家茂宰允陟宜民宜人宜補袞職  
入侍承明邦之司直蹇蹇危言岳岳正色國是  
攸賴左繩右墨維辟之楨伊誰之植曰維君子

有穀是式宜受于天亦錫爾極胡然而逝如日  
之晏凡百曷仰罔不心惻矧維中行不任悃悞  
噫乎有皇孰豐孰嗇食報云長愍遺匪棘哀而  
且榮陰隲不忒薄奠用懌旣齊旣稷敢格幽明  
豈伊異域

祭臧一齋封君文

肅肅僖伯臧之始祖世篤忠貞昌後于魯秉禮  
而南顧渚是卜明德之後其始必復惟公恂恂  
覃精經術屢蹶詞場晚就徵辟不腆一官非公

所屑授經三難聿弘世業走在髫年矚特異  
游季孟間不啻兄弟攜手先君布衣相愛各言  
其子相期有待走忝前驅伯亦展翮仲雖晚遇  
哀然京國

聖主加恩而翁輝映車騎滿庭牛酒相慶先君  
之喪公視易簣公之悼亡走也哭泣備在肺腑  
肝膽若一公愉則愉公戚與戚滇歸伏謁視履  
矯矯動色稱賀天錫難老入閩幾何公乃奄徂  
扒服靡由涕泣如雨古所難兼榮名上壽矧也  
尺牘

兩院祭封君太師張公文代作

粵昔崧降曰甫曰申本于四岳楚有哲人聿佐  
中興張仲孝友厥孝伊何忠於我后猗與相國  
應運於荆楚材奕奕公篤厥生肆我

世宗天造郢邸爰省其邦名世以啓推 恩褒  
錫賚於丘園燕貽翼子龍受神孫爰孺



先皇及托顧命平章密勿師保

坤聖尚方歲月存問江陵以介眉壽萬福是承  
薄海歌謠太公尚父百僚是式萬姓是怙達尊  
之德如玉如金以風以雅太古遺音賢仲諸昆  
邦家之器偕老以嬉俾昌俾熾敬聽司命完歸  
天年相國請制

帝曰達權元輔之躬轂乎社稷父不遑將哀

痛罔極庭有義訓實惟大忠載稽四制奪情以  
從溫綸懇留卓越前典賻葬極榮達孝以顯  
某等弭節江右伊邇尊慈弗克匍匐敬奠哀詞  
上叩九閔下周六幕魂兮靈兮庶幾來酢

### 祭兩樓陸年丈文

維陸之先明德發祥幼節勳烈士龍文章公承  
華胄曠代齊芳譬彼珠府產必夜光甫在坤年  
文聲奕奕弱冠未幾早推鄉國龍變雲蒸意已  
叵測一第寧多七上始得水部為郎延津出守  
衽席絃歌於何不有國之股肱民之父母郡有  
享堂遺愛不朽簡在

帝心質有文武秉憲鬼方用紓 南顧文德覃  
敷式靈鐘鼓奉諱還矣扳號增戀再起南閩舊  
民喜見立翦鯨鯢爰封京觀大海妖氛崇朝清  
晏惟

帝念功謂篤不忘彤弓載錫銅柱彌光言將登  
汝深謀廟廊胡天不吊竟殞膏肓吁嗟哀哉往  
守延津爰有亭堂再監軍旅功在旂常庭有玉  
樹野有甘棠曰德與功沒而不忘維公宦游疆  
牟閩越故侶遺珉甫離而合合若珠還離同劍  
別眷念平生如環而玦吁嗟哀哉閩人雖愛不  
若故鄉武夷洵美尚異吳岡雨樓舊履百年是  
將魂兮別矣盡此一觴

又

恂恂陸公夙秉靈異龍駒鳳雛奕世克類庚子  
計偕余忝附驥相顧莫逆愛逾同氣公甫韶年  
長余一日紫馬青衫朱顏白皙光照西湖庶幾  
連壁鳴鏑詞場觀者辟易屢獻未投七上幾棄  
鹽驥長號陵陽泣視余旣先達公亦晚遇憔悴

廿年各沾一第釋褐司空允宜水土

皇鑒揆留剖符劔浦攬轡澄清爭歌來暮所至  
見思尸鄉桑楚

帝眷循良冰操介立飭兵鬼方敷漢威德文武  
竝用化行絕域失怙東還諸夷扳泣閩廣妖氛  
五兵是詰借箸行籌鯨鯢就殛捷書屢馳海波  
遂息除目方登修文見逼余昔被播久困積薪  
公嬰家難末路逡巡歷三十載合并于閩忽若  
雙劔永別延津嗟君哀榮世所共聞策封鼎食

蚤逮嚴君詵詵四俊爲機爲雲郡有血食策有  
書勲吁嗟哀哉惟余與公意氣鮮偶綠鬢論交  
逮茲白首視藥省舍奔走靡後如可贖兮百身  
何有吁嗟哀哉草疏乞身擬從范蠡豈謂真歸  
神游樵李帛舫笙歌畫樓煙雨魂兮歸來千秋  
容與敬奠一卮平生已矣

祭誥封張宜人文

瞻綵婺于南紀兮奕奕斗墟爰降靈于碩人兮  
懿德攸殊旣閑內則兮兼誦法乎詩書流俗徒

嗷嗷兮竟作嬪于名儒椎布操作兮甘閭內之  
拮据烝烝孝養兮浣子舍之厠踰斷機絲以勗  
君子兮蚤奮翼于天衢相將宦所兮匡飭靡渝  
帝綸寵錫兮光映匡廬珙兮瑱兮環珮鏘如何  
遭命之奇薄兮嗟蘭夢之猶虛抱幽憂以沉緜  
兮歷日月之居諸稍通問於家庭兮重慈母之  
鬱紆睠宜人之孝謹兮夙昔勤劬榮華燁其始  
茂兮溘中折于海隅忽太君之凶問兮曾不須  
臾痛玄草之未謝兮傷合歡之早徂吊者在廬  
兮唁者在途歎夫君之多艱兮寧荼蓼之可茹  
維懿德與榮名兮蓋庶幾乎永圖某等辱君子  
之清塵兮義如貫珠欽芳儀之比玉兮敬奠生  
芻悵丹旒之西還兮四牡與俱故鄉咫尺兮從  
汝姑之所居

祭范母陸太宜人文

維太宜人鍾秀華族士行夙成慈惠明淑嬪于  
德門率禮敦睦以養以祀以莫不肅矯矯贈君  
褒然長者宜人相之義聲滿野天畀儒宗舍董

軼賈簡在 臨軒名冠天下 奏對萬言并包  
羣籍授者伊誰 韋母是式入領太史編摩是力  
又誰貽之大家 維則南遷廷尉雋生是擬獄有  
平反母心則喜 賜環 經筵每奏稱 旨反覆  
勸戒敬姜是似 名世軼才母寧天授貽哲發祥  
母德維茂爲

帝良弼豈惟昌 後年雖有涯澤則不朽鼎食鸞  
章恩榮非一金 馬玉堂閨內鮮匹行忝通家義  
在同恤遙奠生 芻望風沾臆

祭劉中丞太夫人文

維松孕靈篤生 哲輔伊誰開先曰維太母發祥  
自唐克昌胤祚 蹈禮稱詩蘭儀玉度言歸于劉  
折節儉素撫爾 象賢攜持調護鬱起內臺繡衣  
持斧 寵命省方自滇及楚母教之忠哀職是  
補簡在

帝心質有文武 提衡三省用紓 南顧俯念慈  
幃西日云暮乃 御板輿承歡幕府入奉母訓外  
經戎務介福方 遐胡然仙舉月冷機絲星沈寶

天目先生集 卷之十八  
癸哀哀中丞茹荼匪苦言念純孝錫類南土况  
也 温綸如丹如臆懿德榮名標映千古其等  
密邇轅門宛其在廡仰止壺儀憂均陟岵官守  
是羈靡由奔赴敬奠生芻式彰永慕

天目先生集卷之十八

終

